

湘城訪古錄卷五

善化陳運溶芸畦纂

坊市類

濯錦坊

明統志云賈誼故宅在府城中濯錦坊

案坊名甚雅一統志暨省志皆載之究不知起自何時

國朝陳起詩長沙秋興黃葉蕭森辭故林江城暝色動疏
砧不堪鴻雁催秋信自讀離騷識楚音香草美人多醞藉西
風帝子漫悲吟臨湘一酹長沙傅濯錦坊頭落日深
熊少牧濯錦坊弔賈太傅長沙自古離騷國太傅忠貞繼
汨羅大事疏陳拌淚盡少年遷謫誤才多寒林槭槭風吹雨
故并沈沈水不波禮樂承平關氣數明良知遇惜蹉跎

湘城訪古錄卷五

坊市

一

雞狗坊

清異錄云湖南馬氏有雞狗坊卒長能種子母蔗

安業坊

元陸友墨史云長沙多墨工惟胡氏景純墨千金獺髓者最著
州城大街之西安業坊有煙墨上下巷永豐坊有煙墨上巷

永豐坊

墨史云永豐坊有煙墨上巷

孝順坊

府志云在學院署西俗傳為元翊刺氏割股救母處萬歷總志

云翊刺氏母病割股救之至今稱其地曰孝順坊

嶽麓書院坊

明吳道行嶽麓山水記云濱江約四里爲古柳堤中有石坊曰嶽麓書院宋眞宗賜額也續嶽麓志云江岸石坊明嘉靖四年同知嚴陵俞夔創建上泐嶽麓書院四大字額後皆署銜名今惟同知俞通判永甯陳可識其姓餘僅存官銜

護國佑民坊

府志云爲眞武宮立

案坊在巡撫署前相傳明吉藩所建樑柱皆楠木爲之高四

湘城訪古錄卷五

坊市

二

五丈 國朝屢有修葺其木質仍舊也

宗伯師臣坊

府志云爲莊天合立明葉燦撰莊學士傳云門人錢春巡按楚中躬謁寢園且捐俸建坊題曰泰山梁木四方名卿碩彥遷客騷人舟車所至登臨憑弔者畱題戶壁常滿

案坊係石質在湘春門內正街建自明天啟甲子 國朝道光壬寅重修上鐫宗伯師臣下鐫禮部右侍郎兼翰林院侍講學士莊天合旁鐫整飭上江防兵備湖廣按察司副使門人錢口建立

故市

水經注云湘州城之西北有故市北對臨湘縣之新治

新市

影宋本寰宇記云在長沙縣東北一里半昔吳芮爲長沙王百姓種植累年不熟民乏困弊王遣人訪問至澧州有一道士有狀聞王云郡東南皆流水此土豐可置市王遂徙市以背流水自此五穀歲熟人無災患

大陽市

府志云長沙霧陽鄉有古大陽市明楊廷相譜序云吾家世居

湘城訪古錄卷五

坊市

三

青山之下青山又名石門山其支逶迤而西廣衍平厚者爲陽市街陽市街古市井闐闐地也

南嶽市

一統志云在善化縣西嶽麓山南亦稱南嶽鎮

案 國朝儲大文嶽市遊記云秋八月五日舟發衡陽七日抵嶽市嶽市者南嶽廟市四山環合西少夷而東南特厰朗可容十萬人平岡可馳澗可涉高山可控險間道可出奇設伏此古戰場而吾郡宋兵部侍郎湖南制置副使知潭州向公士璧嘗遣將扼之以敗兀良哈鰥者也據此則宋史所云

敗蒙古兵於南嶽市確在衡山境非善化之南嶽市也省志引方輿紀要謂嶽市之戰在善化境者誤也

暮雲市

明史地理志云善化縣南有暮雲市巡檢司一統志云暮雲鎮在善化縣南五十里亦名暮雲市方輿紀要云明置巡司今裁國朝黃文琛次暮雲市作朝煙散危堞風鬢吹空涼我逐旂幢出秋日團清光記里曾疇曩修塗達衡湘野館飾華餞延仁同彷徨是時農工畢耒板休平場轉饋曷依賴歲熟天降康鄰屋新黝聖人語喧糟牀竹柵絡叢蔓秋實懸青黃卧犢石澗靜晚花村路香領取佳趣溢內樂深以長垂老性益拙塌翼羞攀翔有田行且歸夙念其可償

潑灣市

湘城訪古錄卷五

坊市

四

一統志云在善化縣西五里湘江西岸

榔梨市

一統志云在長沙縣東三十里水道通瀏陽縣舊有榔梨稅課局久廢

長沙驛

省志云在長沙縣南唐置韋迢畱別杜員外詩江畔長沙驛相逢纜客船杜甫送劉判官詩杜陵老翁秋繫船扶病相識長沙驛又云他日臨江待長沙舊驛樓皆指此

唐柳宗元長沙驛前南樓感舊自注昔與德存亡三十秋今來數行淚獨上驛南樓

海鶴一為別

潭州驛

錢塘遺事云李兩山有詩題潭州驛

元李兩山題潭州驛懷李肯齋天運由來有廢興義無兩大一身輕封疆社稷若不死婦女鬚眉何用生紐解綱常重
接續灰寒萬劫獨光明便當配食三閭廟啟迪民彝開太平
死自肯齋火問死水

臨湘驛

省志云在長沙縣前五里明置

明江盈科臨湘驛夜雨山館支牀夢未成芭蕉葉上可憐
聲居人爭繪瀟湘景偏是今宵不忍聽

銅官驛

省志云在長沙縣北九十里明置

湘城訪古錄卷五

坊市

五

橋頭驛

乾隆府廳州縣圖志云長沙有橋頭驛

國朝姚鼐由橋頭驛至長沙雜樹接行雲晨朝吐清氣遙望西峰頂已上丹霞蔚遠山狀一同近嶺形千彙澗霧忽成
陰巖蘿密如衣冷風發空響幽愴多髣髴漸出深谷口始縱
秋泉沸湘帆轉昭曠塗夷畫經緯過往湊舟車趨來孰涇渭
物象倏以遷亭午待猶未緬憶獨居情將毋徇俗畏

高口戍

一統志云在長沙縣西北高口水經注云湘水之左岸有高
口水出益陽縣西北逕高口戍南

瀏口戍

方輿紀要云在長沙府北五里亦曰瀏江戍江左所置唐天祐四年淮南將劉存等侵潭州州將黃璠帥戰艦屯瀏陽口會大雨存等遂至越隄注在瀏陽境內璠絕江合擊盡俘其眾胡氏曰瀏江口有駱駝觜謂之駝口馬希萼攻長沙希廣屯駝口以至湘陰諸路水經注云湘水又逕瀏口戍西北對瀏水明統志云瀏陽水在府城北五里源出大圍山有二源曰大溪曰小溪合流經瀏陽縣西名渭水過縣前名瀏水西流入湘水

瀉口戍

水經注云瀉水又東入臨湘縣歷瀉口戍東南注湘水

湘城訪古錄卷五

坊市

六

喬口鎮

一統志云在長沙縣西北六十里路通益陽明置巡司今裁喬唐作橋宋改新唐書地理志云長沙有喬口鎮兵元豐九域志云潭州長沙縣有橋口一鎮明史地理志云長沙有喬口巡檢司方輿紀要云當益陽喬江之口五代周廣順二年王逵襲潭州克益陽進喬江及湘陰至潭州

案杜甫有入喬口詩已作喬唐書偶寫爲橋非別有證據也鄙意以爲喬卽高字之譌水經注所云高口戍卽此地高與喬字形相似後人遂改高口爲喬口耳

石榔口

方輿紀要云石榔口在善化縣西梁太清末湘東王繹遣鮑泉攻蕭譽於湘州軍於石榔寺卽石榔口也水經注云湘水左合誓口又北得石榔口並湘浦也

四通館

浩然齋雅談云潭州有四通館

湘中館

張南軒集有湘中館詩

宋張栻湘中館餞弟定叟分韻得位字 江樓倚夜闌樽酒畱客醉挽衣更小語不盡今夕意吾家德義尊此豈在名位

湘城訪古錄卷五

坊市

七

勉哉嗣芬芳停此寬別思

楊萬里湘中館 江欲浮秋去山能渡水來 嫩隅蠻語雜欵

乃楚聲哀寒早當緣閨詩成未費才 愁邊正無奈 歡伯一相開

飛虎寨

省志云在北門內宋知潭州辛棄疾建飛虎軍於此宋史列傳云辛棄疾乞別剏一軍以湖南飛虎爲名詔委以規畫迺度馬殷營壘故基起蓋砮柵招步軍二千人馬軍五百人經度費鉅萬計議者以聚斂聞降御前金字牌俾曰下住罷棄疾受而藏之出責監辦者期一月飛虎營柵成違坐軍制如期落成開陳本末繪圖繳進上遂釋然時秋霖幾月所司言造瓦不易問須

瓦幾何曰二十萬棄疾曰勿憂令廂官自官舍神祠外應居民家取溝甃瓦二不二日皆具僚屬歎伏軍成雄鎮一方爲江上諸軍之冠元史列傳云伊埒默色原作月里麻思太宗時使宋議和抵淮上宋將以兵脅之降伊埒默色言辭慷慨不少屈宋將乃囚之長沙飛虎寨三十六年而死世祖深悼之

青天寨

府志云在善化縣西五十里屹立雲表上有古寨垣

國朝王文清青天寨戎馬承平不計年猶餘孤砦立青天國殤夜哭深秋雨劍氣朝橫薄暮煙芳草野花迷舊壘斷橋流水拾殘鞭一夫能用當關力好與清時鎮楚邊